

中吳紀聞





中 吳 紀 聞

龔 明 之 紀

中吳紀聞序

吾家自先殿院占籍中吳。距今幾二百禩。相傳已及雲仍矣。明之幼嘗逮事王父。每聞講論鄉之先進。所以誨化當世者。未嘗不注意高仰云。少長從父黨游。皆名人魁士。及又獲識典刑於親炙之久。乃從事於進取。虞庠魯泮。餘三十年。同舍亦多文人行士。揭德振華。咸有可紀。厥後世異事變。利門名路。絕不復往。由是聲迹益晦陋。瓜疇芋區。不過老農。相爾汝所與談笑者。無復有鴻儒矣。竊嘗端居而念焉。凡疇昔飢聞而厭見者。往往後輩所未喻。今年九十有二。西山之日已薄。恐其說之無傳也。口授小子昱。俾抄其大端。藏之篋衍。不惟可以稽考往跡。資助談柄。其間有裨王化。關士風者頗多。皆新舊圖經及吳地志所不載者。至于鬼神夢卜。雜置其間。蓋効范忠文東齋紀事體。談諧嘲諢。亦錄而弗棄。蓋效蘇文忠公志林體。皆取其有戒於人耳。昱新學小生。屬意不倫。措辭無法。不可以爲書。予意爲是不滿。必得老於文者鑒括之。庶幾不爲撫掌之資。而使後之人誦其所聞。以代莊舄之吟爾。淳熙九年。中和日。宣教郎。賜緋魚袋致仕。龔明之。期頤堂書。

中吳紀聞目錄

第一卷

范文正公

丁陳范謝

鬪百草

梅聖俞與僧良玉詩

白樂天

唐郎官題名

解額

陸宣公

孫百篇

蘇子美

趙霖水利

崑山編

許洞

辟疆園

陳君子

半夜鐘

六經閣記

丁晉公

紅蓮稻

太一宮

紅梅閣

先高祖

黃氏三夢

臯橋詩

謝賓客

春申君

丁晉公拜老郁先生

木蘭堂詩

富祕監

楊惠之塑天王像

王運使減租

第二卷

姚氏三瑞堂

張文定公知崑山

曾大父

滕章敏公

范文正公復姓

五柳堂

中隱堂三老

張子野吳江詩

蔣密學

李璋

林大卿買宅

智積菩薩

三江口

鬪鳴

丁氏賢惠錄

傳燈錄

婁侯

滄浪亭

鄭宣徽

林氏儒學之盛

國一禪師

葉少卿

二游詩

安定先生

蘇子美飲酒

張伯玉郎中

上方詩

陳龍圖使高麗

樂圃先生

海涌山

盧通議

閭門樓詩

隨緣居士

章守子用皂蓋

石點頭

軌革卦影

夢石天王像

改正洪範篇

范文正四子

林酒仙

章岷

鮑魚

徐都官九老會

第三卷

葉道卿

觀風樓

三高亭

程光祿

晉公飯僧疏

蔡君謨題壁

郊正夫

鬱林石

范文正還鄉

幽獨君詩

吳王拜郊臺

南翔寺

崑山夫子廟

張翰

橋名

白公檜

方子通

甫里

秦娘

朱子奢

白馬磯

陳君子父殿丞

謝希深

清遠道士詩

本禪師

范貫之

張敏叔

孫子和

皮日休

賀方回

癸甲先生

破山寺詩

有腳書廚

南園詩

錢氏納土

禪月大師

第四卷

太公避地處

范忠宣公

滕章敏公結客

思賢堂

顧學正

鄭希尹

執爨詩

王元之畫像

雙蓮堂

慧感夫人

孫若虛滑稽

元少保

仲殊

如村

鄭毅夫吳江橋詩

張幾道挽詩

夜航船

范文正不取燒煉方

俗語

方子通詩誤

盧發運

大雲翁

花客詩

中吳

祖姑教子登科

范祕丞

徐朝議

顏夫人

信義縣

李無悔

蠡

大本錢王後身

郊正夫失鶴詩

黃姑織女

孫積中

王主簿

著作王先生

第五卷

唯室先生

姑蘇百題詩

范祕書

張子韶與周煥卿簡

蝦子和尙

郭家朱砂圓

陳了翁鱸鄉亭詩

起隱子

閭丘大夫

寶嚴院

洞庭山

方子通紅梅詩

范無外

綽堆

陸彥猷

翠微集

生老病死

郊子高

鄭應求

王學正

吳縣寇主簿詩

魏令則侍郎

草腰帶聽聲

翟忠惠

謂三命

臞菴

蛇化爲劍

易承天寺名

王教授祭學生文

第六卷

西樓詩

凌佛子

王唐公

獄山

范文正爲閻羅王

盤溝大聖

圖經刊誤

壓雲軒詩

白雲泉

范文正詞

蠡口

賈表之

章戶部

沈元敍滄浪亭詩

郭仲達

崑山學記

顧景繁

慈受禪師

孫郎中

南北章

王彥光

四幡之助

吳江詞

丁令威宅

蘇之繁雄冠浙右

翟超

叔父記館中語

羊充實

之彝老

朱氏盛衰

無菴

周妓下火文

蔣侍郎不肯立坊名

潘悅之侍郎

余良弼占卦影

狀元讖

樂菴

石湖

周朝宗

朱光祿

正訛

徐聖望

蘇民三百年不識兵

紀異

徐稚山

結帶巾

諧謔

思韓記

吳中水利書

徐氏安人詩

中吳紀聞

目錄

中吳紀聞卷第一

宋崑山龔明之希仲紀

范文正公

天聖五年。范文正公居母喪。上書宰執。請擇郡守。舉縣令。斥游惰。去冗僭。遴選舉。崇教育。養將材。實邊備。保直臣。斥佞人。使朝廷無過。生靈無怨。以杜姦雄。凡萬餘言。時王文正公會爲相。見而偉之。服滿薦充館職。由此爲人主所知。不次擢用。慶歷三年九月。拜叅知政事。上開天章閣。訪以治道。公條陳當世急務十條。一曰明陟黜。二曰抑僥倖。三曰精貢舉。四曰擇官長。五曰均公田。六曰厚農桑。七曰脩武備。八曰覃恩信。九曰重命令。十曰減徭役。上嘉納之。一歲之間。次第舉行。無或遺者。公初上宰相書。卽受知於王文正。後陳十事。卽見聽於仁宗。雖曰抱負奇偉。不容不見於施設。自非聖君賢相。委曲信任之。亦安能行其所學邪。

許洞

許洞。太子洗馬仲容之子。洗馬墳在城西。登咸平三年進士第。平生以文章自負。所著詩篇甚多。當世皆知其名。歐陽文忠公嘗稱其爲俊逸之士。所居惟植一竹。以表特立之操。吳人至今稱之曰許洞門前一竿竹。真

廟祠汾陰。時洞爲均州叅軍。在路獻文章。令召試中書。予之族妹適洞之曾孫見其家藏洞之敕牒三四紙

洞與潘閬錢易爲友。狂放不羈。閬坐廬多遜黨亡命。乃變姓名。僧服入中條山。洞密贈之詩曰。潘逍遙平生才氣如天高。倚天大笑無所懼。天公嗔汝口叻叻。罰教臨老頭補納。歸中條。我願中條山。山神鎮長在。駟雷叱電。依前趕出這老怪。

丁陳范謝

錢武肅王鏐之子。廣陵王元璩。廣陵王之子。威顯王文奉。皆爲中吳軍節度使。開府於蘇。時有丁陳范謝四人者。同在賓幕。丁諱守節。陳諱贊明。范諱夢齡。謝諱崇禮。職中吳軍節度推官。俱以長者稱。守節者。丞相謂之祖。贊明者。屯田之奇。字虞卿之曾祖。夢齡者。叅政仲淹之曾祖。崇禮者。太子賓客溥之父。其子孫又皆登高科。躋膺仕。足見慶源深厚矣。

辟彊園

吳中舊傳池館林木之勝。惟辟彊園爲第一。辟彊姓顧氏。晉人。見於題咏者甚衆。李太白云。柳深陶令宅。竹暗辟彊園。陸羽云。辟彊舊林園。怪石紛相向。陸龜蒙云。吳之辟彊園。在昔勝概敵。皮日休云。更葺園中景。應爲顧辟彊。近世如張伯玉亦云。于公門館辟彊園。放蕩襟懷水石間。今莫知其遺跡所在。

鬪百草

吳王與西施。嘗作鬪百草之戲。故劉禹錫詩云。若共吳王鬪百草。不如應是欠西施。

陳君子

陳之奇字虞卿。鄉人以其有賢德。故以君子稱之。初登第。爲鄱陽尉。後爲丹徒泰興令。李瑋尙秦國大長公。主下國子監。舉通經術有行義者爲教授。遂以公充選。未幾乞致仕。遷太子中允。時年未五十。俄除平江軍節度掌書記。復以爲教授。詔裝錢促遣之。力辭不赴。公道德著於鄉。雖閭巷小兒亦知愛敬。有爭訟久不決者。跨蹇驢至其家。以大義感動之。皆爲之革心。自掛冠後。閒居十八年。熙寧初卒。葬花山。王岐公爲作志。題之曰。陳君子墓銘。始公之謝事也。蔣堂侍郎語人曰。舉天下皆知有富貴。而虞卿獨以知止。易衆人之心。吾喜林下有人矣。因爲賦詩曰。寵秩拜春坊。歸休識慮長。掃門卑魏勃。設醴謝元王。一水尊鱸國。羣山橘柚鄉。喜君添老社。煙駕共徜徉。張伯玉郎中亦贈之詩曰。東吳王孫歸掛冠。玉絲紅鱸滿雕盤。狂吟但覺日月久。醉舞不知天地寬。小圃移花山客瘦。夜窗搗藥橘童寒。新書近日成多少。且告先生旋借看。

梅聖俞與僧良玉詩

崑山慧聚寺僧良玉字蘊之。僧行甚高。旁通文史之學。又善書。工琴棋。因游京師。梅聖俞見而喜之。以姓名聞于朝。賜以紫衣。其東歸也。聖俞以詩送之曰。來衣茶褐袍。歸變棹色服。扁舟洞庭去。落日松江宿。水煙晦琴徽。山月上巖屋。野童遙相迎。風葉鳴橡櫺。後潛遁故山。專以講經爲務。號所居曰雨花堂。

半夜鐘

唐張繼宿楓橋詩云。月落烏啼霜滿天。江村漁火對愁眠。姑蘇城外寒山寺。半夜鐘聲到客船。昔人謂鐘聲無半夜者。詩話嘗辨之云。姑蘇寺鐘多鳴於半夜。予以其說爲未盡。姑蘇鐘唯承天寺。至夜半則鳴。其它皆五更鐘也。此張繼詩。王氏學林新編。誤以爲溫廷筠。

白樂天

白樂天爲郡時。嘗攜客滿蟬態等十妓。夜游西武丘寺。嘗賦紀游詩。其末云。領郡時將久。遊山數幾何。一年十二度。非少亦非多。可見當時郡政多暇。而吏議甚寬。使在今日。必以罪去矣。

六經閣記

姑蘇自景祐中。范文正公典藩。方請建學。其後富郎中嚴繼之。又建六經閣。張伯玉公達。嘗爲郡從事。遂命爲之記。今但傳其篇首數句。聞見錄又誤載其始末。予家偶藏公達所著蓬萊集。恐後人不復見全文也。因具載之。六經閣。子史在焉。不書尊經也。吳郡州學。始由高平范公經緝之。其後天章蔣公待制中書柳舍人。史館昭文張陸二學士。行郡事殿中丞李公仲塗先生之猶子中臺柳兵曹。今尙書富郎中。十年更八政。仁賢繼志。學始大成。丙戌年。六經閣又建。先時書籍草創。未暇完緝。廚之後廡。澤地汙晦。日滋散脫。觀者惻然。非古人藏象魏拜六經之意。至是富公始與吳邑長洲二大夫。以學本之餘錢。僦之市材。直公堂之南。臨泮池。建層屋。起夏六月乙酉。止秋八月甲申。凡旬有七浹。計庸千有二百。作楹十有六。棟三架。雷八桷。三百八十有四。二戶六牖。梯衝竅。稅垆墁。陶甓稱是。祈於久。故爽而不庳。酌於道。故文而不華。

經南嚮。史西嚮。子集東嚮。標之以油素。揭之以油黃。澤然區處。如蛟龍之鱗麗。如日月之在紀。不可得而亂矣。判天地之極致。皇王之高道。生人之紀律。盡在是矣。古者聖賢之設教也。知函夏之至廣。生齒之至衆。不可以頤解耳授。故教之有方。導之有源。乃本庠序之風。師儒之說。始於邦達於鄉。至於室。莫不有學。烜之以文物。聳之以聲明。先用警策其耳目。然後清發其靈腑。故其習之也易。其得之也深。其教不肅而成。不煩而治。歐元元入善域。優而柔之。使自得之。萬世之後。尊三王四代法者。無他焉。教化之本末。馴善也。然則觀是閣者。知六經之在。則知有聖人之道。知有聖人之道。則知有朝廷之化。知有朝廷之化。則嚮方之心。日懋一日。禮義之澤。流于外。絃歌之聲。格于內。其爲惡也。無所從。其爲善也。有所歸。雖不欲徙善遠罪。納諸大和。不可召康公之詩曰。豈弟君子。來游來歌。子思之說云。布在方策。人存則政舉。凡百君子。由斯道。活斯民。暢皇極。序彝倫者。舍此而安適。得無盡心焉。諸儒謂伯玉嘗從事此州。游學滋久。宜刊樂石。庶幾永無忽。

唐郎官題名

唐郎官題名碑。承平時在學舍中堂之後。已漸剝缺。兵火後不復存矣。序文乃張長史楷書。長史以草聖得名。未嘗作楷書。世尤愛之。題名之人雖不一。亦盡得古筆法。唐世崇尚字學。用此以取人。凡書皆可觀。今所傳止序文爾。長史蘇人。故立碑於此。

丁晉公